

四庫全書

史部

欽定四庫全書

史部

兩漢博聞卷五至七

詳校官編修_臣李潢

侍讀_臣孫球覆勘

總校官庶吉士_臣何思鈞

校對官庶子_臣鄒奕孝

謄錄監生_臣包文訓

欽定四庫全書

兩漢博聞卷五

宋 楊侃 輯

請間

文帝紀

爰盎傳十九

代王至渭橋羣臣拜謁太尉勃進曰願請間宋昌曰
所言公公言之所言私王者無私

師古曰間容也猶今言中間也請容暇之頃當有
所陳不欲於衆顯論也又注云欲因間隙私有所

白也

鳴鏑

匈奴傳六十四上

冒頓作鳴鏑令曰鳴鏑所射而不悉射者斬已而冒頓以鳴鏑自射其善馬復射其愛妻左右或莫敢射皆斬之後獵以鳴鏑射殺其父頭曼自立

應劭曰鳴鏑髒箭也髒音呼交反師古曰曼音莫

安反

持滿

匈奴傳

持滿傳矢外鄉

師古曰傳讀曰附鄉讀曰嚮持滿言滿引弓弩注矢外捍也

駿驤冠

倭幸傳六十三

司馬相如傳二十七上

孝惠時侍中皆冠駿驤貝帶傳脂粉

師古曰以駿驤毛羽飾冠海貝飾帶駿驤即鷺鳥也音峻儀又相如傳注云駿驤似山雞而小冠背毛黃腹下赤項綠色其尾毛紅赤光采鮮明今俗

呼為山雞其實非也

餐霞

相如傳二十七下

吸沆瀣兮餐朝霞

應劭曰列仙傳陵陽子言春食朝霞者日始欲出
赤黃氣也夏食沆瀣北方夜半氣也并天地玄黃
之氣為六氣

倒景

相如傳 郊祀志五下

貫列缺之倒景

服虔曰列缺天閃也人在天上下向視日月故景
倒在下也

郊祀志登遐倒景如淳曰在日月之上反從下照
故其影倒

涓人

蒼頭軍

陳勝傳一

石奮傳十六

陳勝既為其御莊賈所殺而降秦勝故涓人將軍呂
臣為蒼頭軍起新陽

應劭曰時軍皆著青巾故曰蒼頭軍也師古曰涓

潔也涓人主潔除之人涓音蠲石奮為高祖中涓
中涓官名主居中而涓潔者

上游

項籍傳一 匈奴傳

項羽陽尊懷王為義帝曰古之王者地方千里必居
上游徙之長沙都郴

文穎曰居水之上流也師古曰游即流也又匈奴
傳從上游來厭人

拾芥

夏侯勝傳四十五

夏侯勝每講授常謂諸生曰士病不明經術經術苟明其取青紫如俛拾地芥爾

師古曰地芥謂草芥之橫在地上者俛而拾之言其易而必得也青紫卿大夫之服也俛即俯字也

天極 李尋傳四十五

李尋云紫宮極樞通位帝紀

孟康曰紫宮天之北宮也極天之北極星也樞是其迴轉者也天文志曰天極其一明者太一常居

也太一天皇大帝也與通極為一體故曰通位帝紀也

折膠

鼂錯傳十九

鼂錯曰陛下絕匈奴不與和親臣竊意其冬來南也欲立威者始於折膠來而不能困使得氣去後未易服也

蘇林曰秋氣至膠可折弓弩可用匈奴常以為候而出軍師古曰使得氣去者使其得勝逞志氣而

去

賈豎

張良傳十

張良曰秦兵尚強未可輕也其將屠者子賈豎易動以利令持重寶啗秦將

師古曰商賈之人志無遠大譬如僮豎故云賈豎

長休告

丙吉傳四十四

丙吉居相位上寬大掾吏有罪臧不稱職輒予長休告

師古曰長給休假期令其去職也

大府

張湯傳二十九

大府丞相府也

方中

張湯傳

張湯調茂陵尉治方中

蘇林曰天子即位豫作陵師古曰古謂掘地為阬

曰方今荆楚俗土功築作算程課者猶以方計之

爰書

張湯傳

張湯劾鼠掠治傳爰書訊鞠論報

師古曰傳謂傳逮若今之追送赴對也爰換也以
文書代換其口辭也訊考問也鞠窮也謂窮覈之
也論報謂上論之而獲報也

縣土炭

天文志六 李尋傳四十五

天文志曰冬至短極縣土炭炭動塵鹿解角蘭根出
泉水踊

孟康曰先冬至三日縣土炭於衡兩端輕重適均

冬至而陽氣至則炭重夏至而陰氣至則土重晉
灼曰蔡邕律歷記候鍾律權土炭冬至陽氣應黃
鍾通土炭輕而衡仰夏至陰氣應蕤賓通土炭重
而衡低進退先後五日之中

李尋曰政治感陰陽猶鐵之低仰見效可信者也

孟康曰天文志云縣土炭也以鐵易土耳先冬夏
至縣鐵炭於衡各一端令適停冬陽氣至炭仰而
鐵低夏陰氣至炭低而鐵仰以此候二至也

景星

天文志六

景星德星也其狀無常常出於有道之國

舞知

乾没

張湯傳

張湯舞知以御人始為小吏乾没與長安富賈田甲
魚翁叔之屬交私

師古曰舞弄其智制御他人也服虔曰乾没射成
敗也如淳曰豫居物以待之得利為乾失利為没
乾音干

間適

杜欽傳三十

支庶有間適之心

師古曰間代也音居覓反適讀曰嫡

綠車

金日磾傳三十八 王莽傳六十九上

金敞為衛尉病甚上拜其子涉為侍中使綠車載送
衛尉舍

晉灼曰漢注綠車名皇孫車太子有子乘以從如
淳曰常置左右以待召載皇孫李奇曰欲敞見其

榮寵也

王莽得乘綠車從

師古曰亦以寵之也

珠襦

霍光傳三十八

將廢昌邑王太后被珠襦盛服坐武帳中武士陛戟
陳列殿下

晉灼曰貫珠以為襦形若今革襦矣師古曰陛戟
為執戟以衛陛下

席勝蒯通傳十五

乘利席勝威震天下

師古曰席因也若人之在席上

琅當

西域傳六十六上

後漢循吏傳序注

軍候趙德使屬賓與屬賓王陰末赴相失陰末赴鎖
琅當德殺副已下七十餘人

師古曰琅當長鎖也若今之禁繫人鎖矣琅音郎
後漢注云王莽一家鑄錢保五人没入為官奴婢

男子檻車女子步鐵鎖琅當其頸愁苦死者十七

八

橫行書

西域傳

服虔曰安息國橫行為書記師古曰今西方胡國
及南方林邑之徒書皆橫行不直下也

尉薦

趙廣漢傳四十六

趙廣漢為二千石以和顏接士其尉薦待遇吏殷勤
甚備

師古曰尉薦謂安尉而薦達之

童騎

張敞傳四十六

出從童騎

師古曰以童奴為騎而自從也

便面

張敞傳 王莽傳

張敞為京兆尹無威儀時罷朝會過走馬章臺街使御史驅自以便面拊馬

師古曰便面所以障面蓋扇之類也不欲見人以

此自障面則得其便故曰便面亦曰屏面今之沙
門所持竹扇上裊平而下圓即古之便面也音頻
面反

王莽常翳雲母便面

金布令 蕭望之傳四十八

金布令甲曰邊郡數被兵離饑寒天絕天年父子相
失令天下共給其費

師古曰同共給之也自此以上令甲之文金布者

令篇名也其上有府庫金錢布帛之事因以篇名
令甲者其篇甲乙之次

犀利

馮奉世傳四十九

羌戎弓矛之兵耳器不犀利

晉灼曰犀利也

千人司馬

馮奉世傳

如淳曰漢注邊郡置都尉及千人司馬皆不治民
也

畫象

武帝紀元光元年

詔曰昔在唐虞畫象而民不犯

應劭曰二帝但畫衣冠異章服而民不敢犯師古
曰白虎通云畫象者畫其衣服象五刑

度曲

元帝紀贊

元帝多材藝善史書鼓琴瑟吹洞簫自度曲被歌聲
應劭曰史書周宣王太史籀所作大篆也度曲謂
自隱度作新曲因持新曲以為歌詩聲也荀悅曰

被聲能播樂也臣瓚曰度曲謂歌終更授其次謂之度曲西京賦曰度曲未終雲起雪飛張衡舞賦亦曰度終復位次受二八度音大各反被音皮義反

甲觀畫堂

成帝紀

孝成皇帝元帝太子也母王皇后元帝在太子宫生甲觀畫堂

如淳曰三輔黃圖云太子宫有甲觀師古曰甲者

甲乙丙丁之次元后傳言見於丙殿此其例也畫堂但畫飾耳霍光止畫室中是則宮殿中通有彩畫之堂室

祫祭

平帝紀

元始五年祫祭明堂

應劭曰禮五年而再殷祭一禘一祫祫祭者毀廟與未毀廟之主皆合食於太祖

郡將

嚴延年傳六十

師古曰謂郡守為郡將者以其兼領武事也

股弁

嚴延年傳

嚴延年為涿郡太守按大姓高氏獄吏皆股弁

師古曰股戰若弁弁謂撫手也

縣度

西域烏秣國六十六上 西域屬賓國

烏秣國其西則有縣度去陽關五千八百八十八里

縣度者石山也谿谷不通以繩索相引而度

成帝時屬賓國復遣使獻謝罪漢欲遣使者報送其

使杜欽說大將軍王鳳曰今縣度之阨歷大頭痛小頭痛之山赤土身熱之阪令人身熱無色頭痛嘔吐驢畜盡然行者騎步相持繩索相引二千餘里乃到縣度其鄉慕不足以安西域有求則卑辭無欲則嬌嫚終不可懷服也

師古曰縣繩度也縣古懸字耳

煖飲

西域傳

烏秣國山居累石為室民接手飲

師古曰自高山下谿澗中飲水故接連其手如蟬之為

馬復令

西域傳

當今務在禁苛暴止擅賦力本農修馬復令

師古曰馬復因養馬以免徭賦也復音方目反

田輪臺渠犂

西域傳

武帝初通西域置校尉屯田渠犂是時軍旅連出海內虛耗弘羊等奏言故輪臺以東捷枝渠犂有溉田

五千頃以上臣以為可遣屯田卒詣輪臺以東置校尉三人分護以時益種五穀詔曰今請遠田輪臺起亭隧是擾勞天下非所以優民也

師古曰隧者依深險之處關通行道也

儀形

王莽傳六十九上

唯陛下儀形虞周之盛

子午道

王莽傳

王莽以皇后有子孫瑞通子午道子午道從杜陵直

絕南山徑漢中

張晏曰時年十四始有婦人之道也子水午火也
水以天一為牡火以地二為牝故火為水妃今通
子午以協之師古曰子北方也午南方也言通南
北道相當故謂之子午耳今京城直南山有谷通
梁漢道者名子午谷又宜州西界有山名子午嶺
計南北直相當此則北山者是子南山者是午共
為子午道

跬步

王莽傳

進不跬步

師古曰半步曰跬謂一舉足也音空樂反

毛摯

義縱傳六十

義縱為定襄太守郡中不寒而栗縱以鷹擊為治

師古曰言如鷹隼之擊奮毛羽執取飛鳥也

東濕

甯成傳六十

甯成以郎謁者事景帝好氣為少吏必陵其長吏為

人上操下急如東濕

師古曰操執持也東濕言其急之甚也濕物則易
東操音千高反

曲臺記

孟卿傳五十八

藝文志十

后蒼說禮數萬言號曰后氏曲臺記

服虔曰在曲臺校書著記因以為名師古曰曲臺
殿在未央宮藝文志注如淳曰行禮射於曲臺后
蒼為記故名曰曲臺記漢官儀曰大射於曲臺晉

灼曰天子射宮也西京無太學於此行禮也

大小戴

孟卿傳

梁戴德延君戴聖次君德號大戴聖號小戴皆受經
于后蒼由是禮有大戴小戴之學

驪駒

王式傳五十八

諸博士共薦王式詔除下為博士式徵來諸大夫博
士共持酒肉勞式江公世為魯詩宗心嫉式謂歌吹
諸生曰歌驪駒式曰聞之師客歌驪駒主人歌客毋

庸歸今日諸君為主人日尚早未可也遂謝病免歸
服虔曰逸詩篇名也見大戴禮客欲去歌之文穎
曰其辭云驪駒在門僕夫具存驪駒在路僕夫整
駕也客毋庸歸者庸用也主人禮未畢且無用歸
也

鬼廷栢

東方朔傳三十五

東方朔曰栢者鬼廷也

師古曰言鬼神尚幽闇故以松栢之樹為廷府也

真宅

楊王孫傳三十七

楊王孫病將死先令其子曰吾欲羸葬以反吾真且
曰死者物之歸也精神者天之有也形骸者地之有
也精神離形各歸其真夫裹以幣帛高以棺槨支體
絡束口含玉石欲化不得鬱為枯腊千載之後棺槨
朽腐迺得歸土就其真宅遂羸葬

銛筭

趙廣漢四十六 王溫舒傳六十

趙廣漢為潁川太守先是潁川豪傑大姓相與為婚

姻吏俗朋黨漢患之出有案問故漏泄其語令相怨
咎又教吏為鉅籥及得投書削其主名而託以為豪
傑大姓子弟所言其後彊宗大族結為仇讐姦黨散
落風俗大改吏民相告訐廣漢得以為耳目

蘇林曰鉅音項如餅可受投書孟康曰籥竹籥也
如今宮受密事籥也師古曰鉅若今盛錢藏瓶為
小孔可入而不可出或鉅或籥皆為此制而用受
書令投其中也籥音同王溫舒為中尉少年投鉅

購告言姦

負海

五行志七下之上

秦大用民力轉輸起負海至北邊負海猶言背海也

隼

五行志

師古曰隼鷖鳥即今之鵠也鵠字音胡骨反鵠與

鵠同

方制

地理志八上

黃帝方制萬里畫埜分州得百里之國萬區方制以

為方域也

日夜食

五行志七下之下

李尋傳又注

日夜食則無景立六尺木不見其景以此為候

雒陽

地理志八下

師古曰魚豢云漢火行忌水故去洛水而加佳如

魚氏說則光武已後改為雒字也

酒泉郡

地理志八下

酒泉郡武帝太初元年開

應劭曰其水若酒故曰酒泉師古曰舊俗傳云城下有金泉味如酒

古瓜州

地理志

燉煌古瓜州也地生美瓜

師古曰即春秋左氏傳允姓之戎居於瓜州也其地今猶出大瓜長者狐入瓜中食之首尾不出

靈州

地理志

惠帝四年置有河奇苑號非苑

師古曰苑謂馬牧也水中可居者曰洲此地
在河之洲隨水高下未嘗淪沒故號曰靈州
又曰河奇也二苑皆在北焉

日南郡

地理志

故秦象郡武帝時更名屬交州

師古曰言在日之南所謂北戶以向日者

耐刑

高帝紀第一

高祖七年令郎中有罪耐已上請之

應劭曰輕罪不至於髡完其髡鬚故曰髡古從彡
髮膚之意也師古曰髡當音而髡謂頰旁毛也

髡

高帝紀八年

髡毛若今髡及髡髡之類也髡居例反髡音曷髡音
瞿髡音俞說文云髡髡鬚縑綫之屬蓋方言也別注云
髡織毛為布者

略地

高帝紀

凡言略地者皆謂行而取之用功力少

葭莖之故

王莽傳六十九

中山靖王傳二十三

王莽上言曰自諸侯王以下至於吏民咸知莽與陛下有葭莖

中山靖王曰今羣臣亦有葭莖之親鴻毛之重

晉灼曰葭莖裏之白皮也師古曰葭蘆也莖者其
筍中白皮至薄者也葭莖喻薄鴻毛喻輕薄甚也

前星

五行志七下之下

大辰心也心為明堂天子之象又星傳曰心大星天

王也其前星太子也後星庶子也

河源

西域傳六十六

張騫贊三十一

西域傳河有兩源一出葱嶺山一出于闐于闐在南
山下其河北流與葱嶺河合東注蒲昌海蒲昌海一
名蓋澤者也去玉門陽關三百餘里廣袤三百里其
水亭居冬夏不增減皆以為潛行地下南出於積石
中國河又張騫傳贊曰禹本紀言河出昆侖山高二
千五百餘里日月所相避隱為光明也自張騫使大

夏之後窮河源惡睹所謂昆侖者乎故言九州山川

尚書近之矣至禹本紀山經所有放哉

鄧展曰尚書曰導河積石

是謂河源出於積石積石在金城河關不言出昆侖也

會稽禹穴九疑

司馬遷傳三十二

司馬相如傳注

司馬遷自叙曰遷年十歲則誦古文二十而南游江

淮上會稽探禹穴窺九疑

張晏曰禹巡狩至會稽而崩因葬焉上有孔穴民

間云禹入此穴師古曰會稽山名本茅山也禹於

此會諸侯之計因名會稽也九疑山在零陵營道縣舜所葬也疑似也山有九峯其形相似故曰九疑

紫貝

相如傳二十七上

鈞紫貝郭璞曰紫貝紫質黑文也師古曰貝水中介蟲古以為貨也

珊瑚

相如傳

郭璞曰珊瑚生水底石邊大者樹高二尺餘枝格

交錯無有葉

家徒四壁

相如傳

相如居成都家徒四壁立

師古曰徒空也但有四壁更無資產

犢鼻

相如傳

相如身自著犢鼻褌

師古曰即今之褌也形似犢鼻故以名云褌音之

容反

蜀徼

西南夷傳六十五

巴蜀西南外蠻夷諸侯秦時頗置吏焉秦滅漢興皆棄此國而關蜀故徼

師古曰西南之徼猶北方塞也徼音工釣反張揖曰徼謂以木石水為界者也

請吏

一奇

相如傳二十七下

西南夷傳

卬苴之君長聞南夷與漢通得賞賜多多欲願為內臣妄請吏比南夷

南夷君長以十數夜郎最大武帝時唐蒙往南粵食
蜀枸醬問之知牂柯江出番禺城下歸上書說上曰
竊聞夜郎所有精兵可得十萬浮船牂柯出不意此
制粵一奇也

流離

西域傳六十六上

流離出罽賓國

師古曰魏略云大秦國出赤白黑黃青綠縹紺紅
紫十種流離

變告

韓信傳四

師古曰凡言變告者謂告非常之事

持更

西域傳

杜欽說王鳳曰欲遣使報送屬賓國使斥候七百餘人五分夜擊刁斗自守

師古曰夜有五更故分而持之

附離

五行志七下之下

成帝時夜過中星隕谷永曰星辰附離于天猶庶民

附麗王者也王者失道下將叛去故星叛天而隕以見其象

監奴

霍光傳三十八

霍光愛幸監奴馮子都常與計事

師古曰監奴謂奴之監知家務者也

甲令

宣帝紀地節四年後漢皇后紀十上

文穎曰蕭何承秦法所作為律令經是也如淳曰令有先後故有令甲令乙令丙師古曰甲乙者若

今之第一第二篇耳

後漢書向使設外戚之禁編著甲令改正后妃之制
貽厥方來豈不休哉

試守

一切

平帝紀元始元年

後漢齊武王續傳注

平帝初即位詔二百石以上一切滿秩如真

師古曰時諸官有試守者特加非常之恩令如真
耳非凡除吏皆當試守也一切者權時之事非經
常也猶如以刀切物苟取整齊不顧長短縱橫故

言一切他皆倣此

後漢注云試守者稱職滿歲為真

昆明池

武帝紀元狩三年

發謫吏穿昆明池

臣瓚曰西南夷傳有越雋昆明國有滇地方三百里漢使求身毒國而為昆明所閉今欲伐之故作昆明池象之以習水戰在長安西南周回四十里食貨志又曰時越欲與漢用船戰遂乃大修昆明

池也師古曰謫吏吏有罪者罰而役之滇音顛

居延

武帝紀元狩二年

將軍去病出北地二千餘里過居延

師古曰居延匈奴中地名也

五屬國

武帝紀

匈奴昆邪王殺休屠王并將其衆合四萬餘人來降
置五屬國以處之以其地為武威酒泉郡

師古曰昆音下門反屠音儲凡言屬國者存其國

號而屬漢朝故曰屬國武威今涼州也酒泉今肅州也

詳延

武帝紀元朔五年

詳延天下方聞之士咸薦諸朝

師古曰詳悉也延引也方道也聞博聞也言悉引有道博聞之士而進於朝也

廊時

廊祀志五上

時音止神靈之所止也秦文公夢黃蛇自天下屬地

其口止於鄜衍作鄜時祭白帝焉

李奇曰三輔謂山阪間為衍

密時

郊祀志

作鄜時後八十四年秦宣公作密時於渭南祭青帝

吳陽上下時

郊祀志

自秦宣公作密時後二百五十年而秦靈公於吳陽
作上時祭黃帝作下時祭炎帝自未作鄜時而雍旁
故有吳陽武時雍東有好時皆廢無祀或曰自古以

雍州積高神明之隩故立時郊上帝諸神祠皆聚云
又作吳陽上下時後五十年櫟陽雨金秦獻公自以
為得金瑞故作畦時櫟陽而祀白帝

師古曰畦時者如種韭畦之形而於畦中各為一
土封也畦音下圭反

五時 郊祀志

諸祠唯雍四時上帝為尊高祖東擊項籍而還入關
問故秦時上帝祀何帝也對曰四帝有白青黃赤帝

之祠高祖曰吾聞天有五帝而四何也莫知其說於是高祖曰吾知之矣待我而具五也迺立黑帝祠名曰北時有司進祠上不親往至文帝始幸雍郊見五時趙人新垣平以望氣見上言長安東北有神氣成五采若人冠冕焉宜立祠上帝以合符應於是作渭陽五帝廟帝一殿面五門各如其帝色祠所用及儀亦如雍五時

木寓龍馬

郊祀志

秦祠四時每時用木寓龍一駟木寓車馬一駟各如其帝色

李奇曰寓寄也寄生龍形於木也師古曰一駟亦四龍也

三服官

元帝紀

元初五年罷齊三服官

李斐曰齊國舊有三服之官春獻冠幘緹為首服紈素為冬服輕綃為夏服凡三緹與纚同音山爾

反

司馬門

元帝紀元初五年
後漢趙孝王傳四

項籍傳一

師古曰司馬門者宮之外門也衛尉有八屯衛候
司馬主衛士徼巡宿衛每面各二司馬故謂宮之
外門為司馬門

項籍傳留司馬門三日

師古曰凡言司馬門者宮垣之內兵衛所在四面
皆有司馬司馬主武事故總謂宮之外門為司馬

門

後漢趙王乾居父喪白衣出司馬門

注云諸侯王宮門有兵衛亦為司馬門

陽朔年

成帝紀

河平四年山陽火生石中明年改元為陽朔

師古曰朔始也以火生石中言陽氣之始

微行

成帝紀

鴻嘉五年上始為微行出

張晏曰於後門出從期門郎及私奴客十餘人白衣組纁單騎出入市里不復警蹕若微賤之所為

故曰微行

陵夷

成帝紀鴻嘉二年

帝王之道曰以陵夷

師古曰陵丘陵也夷平也言其類替若丘陵之漸平也又曰陵遲亦如丘陵之逶遲稍卑下也

客土

成帝紀永始元年

詔曰昌陵作治五年百姓罷勞客土疏惡終不可成
服虔曰取他處土以增高為客土

枌榆社

郊祀志五上

高祖禱豐枌榆社

鄭氏曰枌榆鄉名也社在枌榆晉灼曰枌白榆也
社在豐東北十五里師古曰以此樹為社神因立
名也枌音符云反

公社

郊祀志

高祖令縣為公社

李奇曰公社猶官社

官稷

平帝紀

元始三年安漢公奏立官稷

師古曰初立官稷於官社之後是為一處今更創
置建於別所不相從也

槨櫝

成帝紀河平四年

民為水所流死不能自葬者令郡國給槨櫝葬埋

師古曰檣檣謂小棺檣音衛

米鹽

黃霸傳五十九 咸宣傳

黃霸為潁川太守為政米鹽靡密初若煩碎

師古曰米鹽言雜而且細

咸宣為左內史其治米鹽

銀黃

三組 楊僕傳六十

楊僕懷銀黃垂三組

師古曰銀銀印也黃金印也僕為主爵都尉又為

樓船將軍并將梁侯三印故三組也組綬也

郎中令

百官公卿表七上

郎中令秦官武帝更名光祿勳

臣瓚曰主郎內諸官故曰郎中令應劭曰光明也
祿爵也勳功也

中郎將

百官公卿表

中郎有五官左右三將秩皆比二千石

車戶騎三將

百官公卿表

郎中有車戶騎三將秩皆比千石

如淳曰主車曰車郎主戶衛曰戶郎漢儀注左右車將主左右車郎左右戶將主左右戶郎

檻車 陳餘傳二

貫高與趙王檻車詣長安

師古曰檻車者車而為檻形謂以板四周之無所

通見

絕亢 陳餘傳

貫高絕亢而死

師古曰亢者總謂頸耳爾雅云即喉嚨也音工郎

反

沐猴

項籍傳一

人謂楚人沐猴而冠

張晏曰沐猴獼猴也師古曰言雖著人衣冠其心
不類人也

辟易

項籍傳

楊喜為郎騎追項羽羽還叱之喜人馬俱驚辟易數里

師古曰辟易謂開張而易其本處辟音頻亦反

麗譙

陳勝傳一

陳勝攻陳戰譙門中

師古曰譙門謂門上為高樓以望耳樓一名譙故謂美麗之樓為麗譙譙亦呼為巢所謂巢車者亦於兵車之上為樓以望敵也譙巢聲相近本一物

也

蒂芥

相如傳二十七上

賈誼傳十八

吞若雲夢者八九其於胸中曾不蒂芥

張揖曰蒂芥刺鯁也賈誼傳注師古云蒂芥小鯁也

攝弓

相如傳二十七下

攝弓而馳

師古曰攝謂張弓注矢而持之也攝女涉反

騎置

西域傳六十六下

事有便宜因騎置以聞

師古曰騎置即今之驛馬也

斷匈奴左右臂

西域傳贊

後漢班超傳三十七

孝武之世圖制匈奴患其無從西國結黨南羌迺表
河曲列四郡開玉門通西域以斷匈奴右臂隔絕南
羌月氏單于失援由是遠遁而幕南無王庭

後漢班超曰先帝開西域議者皆曰取三十六國號

為斷匈奴右臂

注云哀帝時劉歆上議曰武帝時立五屬國起朔方伐朝鮮起元菟樂浪以斷匈奴之左臂西伐大宛結烏孫裂匈奴之右臂南面以西為右也

分陝

王莽傳六十九中

王莽時分陝立二伯

師古曰分陝者欲依周公召公故事自陝以東周公主之自陝以西召公主之

甌脫

匈奴傳六十四上

東胡使使謂冒頓曰匈奴所與我界甌脫外棄地匈奴不能至也吾欲有之

服虔曰甌脫作土室胡兒所作以候漢也師古曰境上候望之處若今之伏宿舍也甌音一侯反脫音土活反

威斗

王莽傳六十九下

王莽親之南郊鑄作威斗威斗者以五石銅為之長

二尺五寸以厭勝衆兵既成令司命負之莽出在前
入在御旁

李奇曰以五色藥石及銅為之師古曰若今作鍤
石之為

跂行喙息

匈奴傳

上及飛鳥跂行喙息蠕動之類

師古曰跂行凡有足而行者也喙息凡以口出氣
者也跂音岐喙音許穢反蠕音人充反

豬其宮室

王莽傳六十九上

古者畔逆之國既已誅討則豬其宮室以為汙池納垢濁焉名曰凶虛雖生菜茹而人不食

李奇曰掘其宮以為池用貯水也師古曰豬謂畜水汙下也汙音烏所食之菜曰茹

盱衡

王莽傳

盱衡厲色振揚武怒

孟康曰眉上曰衡盱衡舉揚目也

校司馬

南粵王傳六十五

伏波將軍路博德討南粵而南粵王趙建德亡入海
伏波遣人追故其校司馬蘇宏得建德

師古曰校之司馬若今之行軍總管司馬也

受降城

匈奴傳

李陵傳二十四

單于年少好殺伐左大都尉使人間告漢曰我欲殺
單于降漢漢聞此言故築受降城

李陵傳注師古曰受降城公孫敖所築

兩漢博聞卷五

欽定四庫全書

兩漢博聞卷六

宋 楊侃 輯

龍樓

成帝紀十

成帝為太子初居桂宮上嘗急召太子出龍樓門

師古曰三輔黃圖桂宮在城中近北宮非太子宮

張晏曰樓上有銅龍若白鶴飛廉之為名也

枸醬

西南夷傳六十五

唐蒙使南粵食蒙蜀枸醬蒙問所從來曰道西北牂
柯江江廣數里出番禺城下蒙歸至長安問蜀賈人
獨蜀出枸醬多持竊出市夜郎夜郎者臨牂柯江江
廣百餘步足以行船南粵以財物役屬夜郎然亦不
能臣使也

晉灼曰枸音矩師古曰子形如桑椹耳緣木而生
非樹也味尤辛不酢今宕渠則有之食讀曰飢

舉白
叙傳七上

引滿舉白

師古曰引取滿觴而飲飲訖舉觴告白盡不也一
說白者罰爵之名也飲有不盡者則以此爵罰之
魏文侯與大夫飲酒令曰不醵者浮以大白於是
公乘不仁舉白浮君是也

自繆

孝成趙皇后傳

鄭氏曰自縊也師古曰繆絞也居虬反

戲戟

匈奴傳六十四下

漢賜孝單于戲戟十

師古曰戲戟有旗之戟也戲許宜反又音麾

清狂

昌邑王傳三十三

昌邑王清狂不惠

蘇林曰凡狂者陰陽脉盡濁今此人不狂似狂者
故言清狂也或曰色理清徐而心不慧曰清狂清
狂如今曰癡也

著令

吳芮傳四

高祖封吳芮長沙王制詔御史長沙王忠其定著令
鄧展曰漢約非劉氏不王而芮王故著令中使特
王也或曰以芮至忠故著令也故贊云著于甲令
而稱忠也

支庶

吳芮傳

孝惠高后時封吳芮庶子二人為列侯故贊云慶流
支庶有以矣夫

樵蘇

韓信傳四

樵蘇後爨師不宿飽

師古曰樵取薪也蘇取草也小雅白華之詩云樵

彼桑薪

食采

揚雄傳五十七上 刑法志三

揚雄其先出自有周伯僑者以支庶初食采於晉之
揚因氏焉揚在河汾之間

師古曰采官也以官受地謂之采地應劭曰左傳
云霍揚韓魏皆姬姓也刑法志注師古曰因官食

地故曰采地

三輔號為卿

王尊傳四十六

如淳曰三輔皆秩中二千石號為卿也

迹射士

王尊傳

校尉傳剛將迹射士千人逐捕南山羣盜

師古曰迹射言能尋跡而射取之也射食亦反

布鼓

王尊傳

王尊曰毋持布鼓過雷門

師古曰雷門會稽城門也有大鼓越擊此鼓聲聞洛陽布鼓謂以布為鼓故無聲

柱後惠文

張敞傳四十六

應劭曰柱後以鐵為柱今法冠是也一名惠文冠
晉灼曰漢注法冠也一號柱後惠文以纚裏鐵柱
卷秦制執法服今御史服之謂之獬廌一角今冠
兩角以獬廌為名耳纚即今方目紗也纚山爾反
卷去權反

榜掠

孫寶傳四十七

後漢陳寵傳附

師古曰榜掠謂笞擊而考問之也榜音彭

陳寵曰獄者急於箠格酷烈之痛

注云箠即榜也古字通用格擊也又陳萬年傳下獄掠治注云掠擊也力向反

抱弩負蘭

韓延壽傳四十六

如淳曰蘭盛弩箭箠也師古曰鞬輦即兜鍪也蘭盛弩矢者也其形如木桶鞬丁奚反輦莫侯反

雞卜 郊祀志五下

立粵祠而以雞卜

李奇曰持雞骨卜如鼠卜

挺身逃

劉屈氂傳三十六

師古曰挺身也獨引身而逃難

傳會

爰盜贊十九

爰盜雖不好學亦善傳會

張晏曰因宜附著合會之

衣褐

張良傳十

師古曰褐制若裘今道士所服者是

禁錢

賈捐之傳五十四下

賈捐之曰往者暴師曾未一年費四十餘萬大司農
錢盡乃以少府禁錢續之

師古曰少府錢主供天子故曰禁錢

浩穰

張敞傳四十六

長安中浩穰於三輔

師古曰浩大也穰盛也言人衆之多也穰人掌反

清閒之燕

蔡義傳三十六

蔡義上疏曰願賜清閒之燕得盡精思於前上召見說詩甚說之

師古曰燕安息也閒讀曰閑

扼虎

命中

李陵傳二十四

力扼虎射命中

師古曰扼謂捉持之也命中者所指名處即中之

也

儲侍

除舍

孫寶傳四十七

後漢肅宗紀

御史大夫張忠辟孫寶為屬欲令授子經更為除舍

設儲侍

師古曰除為修飾掃除也設儲侍謂豫備器物也

侍史紀反

後漢書云南巡狩詔所經道一郡縣無得設儲侍

注云儲積也時具也言不預有蓄備

擿舛 孫寶傳

傳太后怒曰帝置司隸使擿舛以揚我惡我當坐之
師古曰擿舛謂挑發之擿他歷反舛音決

以日易月 文帝紀後七年

文帝遺詔曰服大紅十五日小紅十四日纖七日釋
服

服虔曰皆當言大功小功布也纖細布衣也應劭
曰紅者中祥大祥以為領緣纖者禪也凡三十六

日而釋服矣此以日易月也晉灼曰漢書例以紅為功也師古曰紅與功同服晉二說是也此喪制者文帝自率己意創而為之非有取於周禮也何為以日易月乎三年之喪其實二十七月豈有三十六月之文禪又無七月也應氏既失之於前而近代學者因循謬說未之思也

檉柳胡桐白草

西域傳六十六上

樓蘭國出玉多葭葦檉柳胡桐白草

注云孟康曰白草草之白者胡桐似桑而多曲師
古曰檉柳河柳也今謂之赤檉白草似莠而細無
芒其乾熟時正白色牛馬所嗜也胡桐亦似桐不
類桑也蟲食其樹而沫出下流者俗名為胡桐淚
言似眼淚也可以汗金銀工匠用之流俗語訛呼
淚為律檉丑成反

臧緇

食貨志四下

萬室之邑必有萬鍾之臧臧緇千萬千室之邑必有

千鍾之臧臧經百萬春以奉耕夏以奉耘耒耜器械種饟糧食必有取澹焉故大賈畜家不得豪奪吾民矣

孟康曰六斛四斗為鍾經錢貫也饟與餉同謂餉田之具也

都護督察

西域傳六十六上

日逐王畔單于將衆來降護鄯善以西使者鄭吉迎之既至漢封日逐王為歸德侯吉為安遠侯因使吉

并護北道故號曰都護都護之起自古置矣都護督
察烏孫康居諸外國

師古曰都猶總也言總護南北之道督視也

單于

文帝紀

匈奴傳六十四上

單于者廣大之貌也言其象天單于然也

師古曰單于匈奴天子之號單音蟬

突門

後漢竇融傳附

注云突門守城之門墨子曰城百步為一突門也

日者 高帝紀

師古曰日者猶往日也

倒縣

賈誼傳十八

賈誼曰天下之執方倒縣凡天子者天下之首何也
上也蠻夷者天下之足何也下也今匈奴嫚侮侵掠
至不敬也而漢歲致金絮采繒以奉之夷狄徵令是
主上之操也天子供貢是臣下之禮也足反居上首
顧居下倒縣如此莫之能解猶為國有人乎

碑碣

後漢竇憲傳附

封神丘兮建隆嶠

注云神丘即燕然山也方者謂之碑圓者謂之碣
嶠亦碣也其例反

騅

項籍傳一

羽駿馬名騅

師古曰蒼白雜毛曰騅蓋以其色名之

贈行

段會宗傳四十

朋友以言贈行

師古曰贈行謂將別相贈也

炳臂蕭

禮樂志二郊祀歌

李奇曰臂腸間脂也蕭香蒿也師古曰以蕭炳脂
合馨香也臂來彫反炳人說反

柘漿

禮樂志樂府歌

泰尊柘漿析朝醒

應劭曰柘漿取甘柘汁以為飲也醒病酒也析解

也

贅壻

賈誼傳十八

秦人家富子壯則出分家貧子壯則出贅

應劭曰出作贅壻也師古曰謂之贅壻者言其不當出在妻家亦猶人身之有疣贅非應所有也贅之銳反分扶問反

隊帥

爰盜傳十九

如淳曰隊帥軍中小官

請室

賈誼傳

爰盎傳

賈誼曰大臣有皐白冠鵲纓盤水加劍造請室而請

皐耳

應劭曰請罪之室蘇林曰車駕出有請室令在前
先驅此官有別獄也如淳曰水性平若已有正罪
君以平法治之也加劍當以自刎也或曰殺牲者
以盤水取頸血故示若此也

爰盎傳云人上書告絳侯反時絳侯已就國徵繫請

室

師古曰請室獄也

兩宮

王莽傳六十九上

師古曰兩宮謂成帝及太后也

祖有功

景帝紀元年

詔曰古者祖有功而宗有德

師古曰祖始也始受命也宗尊也有德可尊

天郊

成帝紀建始二年

應劭曰天郊在長安城南地郊在長安城北

款塞

宣帝紀本始二年

百蠻鄉風款塞來享

應劭曰款叩也皆叩塞門來服從也

什器

平帝紀元始元年

師古曰軍法五人為伍二伍為什則共其器物故
通謂生生之具為什器亦猶今之從軍及作役者
十人為火共畜調度也

除保父母同產令

元帝紀

初元五年詔除光祿大夫已下至郎中保父母同產之令

應劭曰舊時相保一人有過皆當坐之師古曰特為郎中已上除此令者所以優之也同產謂兄弟也

給事官司馬中

元帝紀初元五年

元帝詔今從官給事官司馬中者得為大父母父母

兄弟通籍

應劭曰司馬中者宮內門也司馬主武兵禁之意也籍者為二尺竹牒記其年紀名字物色縣之宮門案省相應乃得入也師古曰從官親近天子常侍從者皆是也

四輔

谷永傳五十五

師古曰四輔謂左輔右弼前疑後丞也

瞽說

谷永傳

聽曖昧之瞽說

師古曰瞽說言不中道若無目之人也曖與暗同

小學

杜鄴傳五十五

杜鄴初從張吉學吉子竦又幼孤從鄴學問亦著於世尤長小學鄴子林清靜好古亦有雅才其正文字過於鄴竦故世言小學者由杜公

師古曰小學謂文字之學也周禮八歲入小學保氏教國子以六書故因名云藝文志載小學十家

三十五篇

首歲

蕭望之傳四十八

師古曰首歲歲之初首謂正月也

下走

蕭望之傳

應劭曰下走僕也師古曰下走者自謙言趨走之役也又司馬遷報任少卿書曰太史公牛馬走注云言已為太史公掌牛馬之僕自謙之辭也

出文選

望舒

揚雄傳五十七

望舒彌轡

師古曰望舒月御也彌斂也言天子之車斂轡徐行故假望舒為言耳

結轍

文帝紀後二年

使者冠蓋相望結轍於道

韋昭曰使車往還故轍如結也

膠葛

揚雄傳下五十七

解難云獨不見夫翠蚪絳螭之將登虜天不階浮雲

翼疾風虛舉而上升則不能擻膠葛騰九閼

師古曰擻揭也膠葛上清之氣也九閼九天之門
擻音戟揭居足反

又甘泉賦齊總總搏搏其相膠葛兮

師古曰膠葛猶言膠加也

獲人揚雄傳

獲人亡則匠石輟斤而不敢妄斲

服虔曰獲古之善塗墍者也施廣領大袖以仰塗

而領袖不汙有小飛泥誤著鼻因令匠石揮斤而
斲之知石之善斲故敢使之也師古曰獮技拭也
故謂塗者為獮人獮乃高反

琴徽

揚雄傳

師古曰徽琴徽也所以表發撫抑之處也

三宮

王嘉傳五十六

師古曰三宮天子太后皇后也

立樂府

禮樂志十

武帝定郊祀之禮祠太一於甘泉祭后土於汾陰乃立樂府采詩夜誦以李延年為協律都尉多舉司馬相如等數十人造為詩賦畧論律呂以合八章之調作十九章之歌以正月上辛用事甘泉園丘使童男女七十人俱歌昏祠至明夜常有神光如流星止集于祠壇天子自竹宮而望拜

師古曰樂府之名蓋起於此韋昭曰竹宮以竹為宮也師古曰采詩夜誦者其言辭或秘不可宣露

故於夜中歌誦也

百賈

王嘉傳

師古曰賈謂販賣之人也

案脉

王嘉傳

師古曰案脉謂切脉也

厭衆意

王莽傳

莽欲厭衆意

師古曰厭滿也一艷反

雅拜

何武傳五十六

何武為京兆尹坐舉方正所舉者召見槃辟雅拜有司以為詭衆虛偽武坐左遷楚內史

服虔曰行禮容拜也師古曰槃辟猶槃旋也辟音闕詭違也

昆雞

司馬相如傳二十七上

張揖曰昆雞似鶴黃白色

靈鼈

相如傳

樹靈鼉之鼓

師古曰以鼉皮為鼓

釋蹻

王褒傳三十四下

離疏釋蹻而享膏粱

應劭曰離此蔬食釋此木蹻也師古曰蹻即鞋也
居畧反史記虞卿躡蹻擔簦說趙注云蹻草履也

褒成君

孔光傳五十一

孔霸以選授太子經元帝即位徵霸以師賜爵關內

侯食邑八百戶號褒成君

如淳曰為帝師教令成就故曰褒成君

尺二牘

匈奴傳六十四上

漢遺單于書以尺一牘中行說令單于以尺二寸牘
及印封皆令廣長大倨驚其辭以答漢漢遣中行說
使匈奴而說不欲行漢強使之說遂降匈奴不歸

高訾

貨殖傳六十一

丹王君房豈樊少翁王孫大卿為天下高訾

師古曰王君房賣丹樊少翁及王孫大卿賣豉亦

致高訾訾讀與資同

力政

游俠傳六十二

五行志七中之下

戰國合從連衡力政爭彊

師古曰力政者棄背禮義專任威力也

天子微弱諸侯力政

師古曰政亦征也言專以武力相征討

酉

郭解傳六十二

郭解姊子負解之勢與人飲使之酺非其任彊灌之
人怒刺殺解姊子

師古曰盡爵曰酺其人不飲而使盡爵乃強灌之
故怨怒也酺子笑反

內朝外朝

劉輔傳四十七

劉輔上書直諫收繫掖庭秘獄於是中朝左將軍辛
慶忌右將軍廉褒光祿勳師丹太中大夫谷永俱上
書諫得減死罪一等

孟康曰中朝內朝也大司馬左右前後將軍侍中
常侍散騎諸吏為中朝丞相以下至六百石為外

朝也

傳漏

董賢傳六十三

董賢傳漏在殿下

師古曰傳漏奏時刻也

梁肉

霍去病傳二十五

食貨志四上

師古曰梁粟類也米之善者食貨志曰梁好粟也

即今之梁米也

特將

去病傳

張良傳十

衛青家為特將者十五人

師古曰特將謂獨別為將而出征也

高帝時魏王豹反使韓信特將北擊之

師古曰特獨也專任之使將也

渾殺

董仲舒傳二十六

賢不肖渾殺

注云穀雜也渾音胡本反

邊穀 劉屈氂傳三十六

如淳曰戍邊卒糧也

車丞相

車千秋傳三十六

千秋本姓田氏為丞相年老上優之朝見得乘小車
入宮殿因號曰車丞相

譙讓 高帝紀

樊噲譙讓項羽

師古曰譙責也才笑反

月蝓日域揚雄傳五十七下

長楊賦西厭月蝓東震日域

服虔曰蝓音窟穴之窟月蝓月所生也師古曰日域日初出之處也

廉問高帝紀五年

高帝詔曰且廉問有不如吾詔者以重論之

師古曰廉察也

詔高帝紀

如淳曰詔告也自秦漢以下唯天子獨稱之

梟騎

高帝紀

項羽未平北貉燕人來致梟騎助漢

應劭曰北貉國也梟健也張晏曰梟勇也若六博之梟也師古曰貉在東北方三韓之屬皆貉類也

莫客反

兜離

後漢董祀妻傳附

言兒離兮狀窈傳

注云兒離匈奴言語之貌

二斬

後漢曹世叔妻傳附

禮夫有再娶之義婦無二適之文故曰夫者天也

注云儀禮曰父在為母何以甚至尊在不敢伸也
父必三年而後娶達子志也夫者妻之天也婦人
不二斬者猶曰不二天也

比落蒙全

後漢姜詩傳附

姜詩至孝赤眉賊經詩里弛兵而過曰驚大孝必觸鬼神時歲荒賊乃遺詩米肉受而埋之比落蒙其安

全

注云比近也落藩也

楚歌

高帝紀五年

漢圍項羽於垓下羽夜聞漢軍四面皆楚歌知盡得

楚地

應劭曰楚歌者雞鳴歌也漢已畧得其地故楚歌

者多雞鳴時歌也師古曰楚歌者為楚人之歌猶言吳歆越吟耳若以雞鳴為歌曲之名於理則可不得云雞鳴時也高祖令戚夫人楚舞自為作楚歌豈亦雞鳴時乎

顧山錢

平帝紀元始元年

平帝詔天下女徒已論歸家顧山錢月三百

如淳曰已論者罪已定也令甲女子犯罪作如徒六月顧山遣歸一說以為當於山伐木聽使入錢

顧工直故謂之顧山應劭曰舊刑鬼薪取薪於山以給宗廟今使女徒出錢顧薪故曰顧山也師古曰如說近之論女徒論罪已定並放歸家不親役之但令一月出錢三百以顧人也為此恩者所以行太后之德施惠政於婦人

體貌大臣

賈誼傳十八

體貌大臣而厲其節也

師古曰體貌謂加禮容而敬之也

官師

賈誼傳

官師小吏

師古曰官師一官之長也

粟紅腐

賈指之傳三十四下

太倉之粟紅腐而不可食

師古曰粟久腐壞則色紅赤也

上東門

賈誼傳

雒陽上東門

師古曰東面最北門曰上東門

跡前事

賈誼傳

臣竊跡前事

師古曰尋前事之蹤跡也

無狀子

杜欽傳三十

紅陽侯與杜業書曰誠哀老姊垂白隨無狀子出關

師古曰無狀猶言不肖也

排擠

杜欽傳

排擠英俊

師古曰擠墜也

橐佗

匈奴傳六十四上

師古曰橐佗言能負橐囊而馱物也

刑名

元帝紀

宣帝所用多文法吏以刑名繩下

師古曰劉向別錄云申子學號刑名刑名者以名責實尊君卑臣崇上抑下宣帝好觀其君臣篇繩

謂彈治之耳

戚里

萬石君傳十六

師古曰於上有姻戚者皆居之故名其里為戚里

廷見

萬石君傳

石建奏事於上前即有可言屏人乃言極切至廷見如不能言者

師古曰廷見謂當朝而見時

議格

文三王傳十七

大臣及爰盜等有所關說於帝太后議格

蘇林曰音閭張晏曰止也

魁岸

江充傳十五

為人魁岸

師古曰魁大也岸者有廉稜如崖岸之形

微諫

伍被傳十五

師古曰私諫之也

假吏

蘇武傳二十四

蘇武使匈奴有假吏常惠等

師古曰假吏猶言兼吏也時權為使之吏若今差人充使典矣

宦吏

外戚傳六十七下

師古曰宦吏謂奄人也

循江上

西南夷傳六十五

將兵循江上

師古曰循順也謂緣江而上也

兩漢博聞卷六